

Spiss – Im Tal vo de Kabel ;)

Hallo Mäntigsflieger! Gärn lade i euch im Spiss zum Übernachte i! Im Folgende es par Infos wo das isch u was me da so cha mache.

Dr Spiss (Name vo üsem Vorsass) befindet sech nördlech oberhalb vom Lütschetal am Hintisbärg. D Koordinate si 636 938 / 166 245 uf 1420 m.ü.M.

Es het insgesamt 9 Schlafmüglechkeite drvo 3 Einzelbett. We de das no nid längt hets de obe ir Schür no gnue Heu wo me o cha lige. Mier si froh, we dier e (Inne-) Schlafsack chönntet mitnä.



Härecho

Für ds härecho gits verschidenschti Müglechkeite. Je nach Wätter, Luscht u Lune tüe mr de entscheide wie mr obsi Gä. We dr e Präferänz heit, Gäbt die doch a! Am beschte sitr so am nami ab de 3e-5i bim Hüttli.

Di lengwiligi:

Mit enem motorisierte fahrbahre Untersatz cha me vom Restaurant Stalden uf dr Strass bis fasch zum Hüttli obsi fahre. Das isch Gäbig für ds Material mit ds Nä, wes schiffet oder für die abgsoffene Gleitschrimler umi i nütlicher frischt obsi ds bringe.

Di gmüetlich z'Fuess:

Vom Bahnhof Burglauenen cha me Richtig Hintisbärg, Schynige Platte loufe u chunnt so uf d'Luega. Vo da us sis no es par Minute bis i Spiss. Höhedifferänz isch +590m.

Di interessanti z'Fuess:

Wär Gärn es interessants Wägli möchti lere kenne, cha vom Lütschetal vor „Louwena“ über die `Schmalì` ufe loufe. Das isch dr diräkt Wäg vom e früecher vil brucht het. Ds Wägli isch fasch geng im Wald u füert teils sogar über Stägene nach obe. Für dä Wäg ds mache brucht me öppe 1½ bis 2 Stund, d Höhedifferänz isch +720m.

Für setiger mit Flügel:

Mu cha natürlich o mit em Gleitschirm häreflüge u de Toplande. Vo Männlichegipfel längts im Gleitflug, vo Firscht us bruchts chli Thermik. Lande tüetr am beschte uf ‚Sengg‘, da isches rächt flach u es het gnueg Platz. Wes geit nid gad mits im Land z’Bode ga u de susch sicher ds Land gli vrla u am Rand packe!



Ässe u triche

Zum Znacht tüe mr grille, es söll jede sälber das mitnä wonär gärn het. I mache e Pfanne Härdöpfel u Salat für alli. Es eifachs Dessärt macheni o. Wasser, Tee, Bier u Kaffee mit oder ohni Chüelmittel hets, Wy u anders Gsöff nämetr bitte sälber mit.

Susch wär no folgendes zum mitbringe für alli:

Apero / Cake zum Kaffee / Zmorge: Brot, Züpfe, Chäs, Konfi, Honig, ev. Orangesaft. (Anke nime i mit)

Variante für am nächste Tag

Nachem Zmorge hei mr de vrschideni Müglechkeite no öppis ds mache. Mi Vorschlag isch z’Fuess zum Fulhore ds loufe u vo dört abe z’Flüge. Das si 1200 Höhemeter u 6km. Wemr nid so wit weit, chönne mr o nume e bitz ufe loufe oder o gad näbem Hüttli starte. Was mr de mache, tüe mr am beschte je nach Wätter am Abe entscheide.